

Herremättli-Clique 1984

Sujet:

Vorwärts - (Volggs) - marsch

Syg d'Schtreggi no so bees verschlaufft:
Me laufft und laufft und laufft und laufft,
me tipplet, segglet und marschieret
in Root, in Gääl, in Blau karriert,
zerscht kryz, denn quer, bärguff, bärgab,
dr Bligg graduus, kai Glid macht schlapp,
denn schliesslig winggt die tollscht Lapalie:
e kunschtschtofffassti Blächmedallie!

Fir so ne wärtloos Schtiggli Mischet
keucht Moslem, Hindu, Jud und Chrischt
als schtinggig dichtgedrängti Masse
und 's transpiriert e jedi Rasse:
dr aint schmeggt suur, dr ander siess,
by däm schwitzt 's Gnigg, by sällem d'Fiess
und dert, wo d'Sozi mit tien hingge,
kennt 's au e bitz nach Irrwäg schtingge:

Bym Volggsmarsch marscht dr letschi Schwanz
und rächnet mit Medallieglanz:
Pfrau Doggter und dr Herr Diräggter,
en ächte Kriminal-Inschpäggtter,
Pfürsorgere und Schtroossewischer,
Usschtyger, Heroinvermischer,
dr Huusfrind - und dä mit de Hörner,
blooss ain marschieret schyntts nit: dr Wörner!

Me marscht dur Fäld und Buuresidlig,
zerscht isch's Triumpfmarsch, denn wird's fridli
dr Aafangs - Schturmmarsch vo dr Härde
isch bald emool als Truurmarsch z'warte,
dä Heldevolggsmarsch, zerscht no munter,
goht in de Blookere bald unter
und trotz dr Coramin-Glukose
bysst sich dr Wolf dur alli Hoose.

Trotz Ovo - gschtyrte Kraftresärve
rysst's an de Musgglen und de Närke;
dr Marsch vo däre Volggsmarschorde
isch quasi zum Proteschtmarsch worde,
me tschalpt bereits im groosse Ganze
zwor schtumpf, derfir mit Wuet im Ranze
und absolut nimm sex-erregend
als Mumienumzug quer dur d'Gegend.

Me weiss jo, dass die Freyluftprätscher
no schtuurer sin als d'Missis Thatcher
und mit dr Schtuurhait vo Computer
quert d'Härde Dorne, Sumpf und Pflutter;
scho japst und schtinggt dr ganzi Huffe,
dr Schwaissgschtangg schreyt zum Himmel uff
und vo däm Odeur, suur und kalt,
schtirbt schliesslig au dr scheenschti Wald.

Au 's Färnseh schtygt bym Volggsmarsch y!
Dr Turnherr kunnt in Euphorie,
das haisst: är glotzt mit schtarrer Myne
zahnbleggend zmitts in d'Optik yne
und weixt, dass d'mainsch, är haig e Panne:
"Da chömmed Heldefrau- und Manne
no früsch und ohni Schweiss am Rancel!"
Denn fällt är wägem Gschtangg in Trance.

He jo: Syg d'Schreggi au verschlaufft:
me laufft und laufft und laufft und laufft,
me tipplet, segglet und marschieret
in Root, in Gääl, in Blau karriert,
zerscht kryz, denn quer, bärguff, bärgab,
dr Bligg schtumpfschtuur - und alles schlapp,
doch schliesslig winggt die bleedscht Lapalie:
e kunschtschtofffassti Blächmedallie!

(E soo, wie mir dr Volggsmarsch kenne,
ka me's au "Misservolggsmarsch nenne!")

Am Fasnachtszyschtig vo demorge am nyne bis
znacht am elfi und am Mittwuchmorge vom
nyne bis am elfi goht me in d'Muschtermäss
an d'Ladärne-Usstellig.